



Sud Bosne i Hercegovine
Суд Босне и Херцеговине

Broj: S1 3 IŽ 023423 16 Iž
Sarajevo, 31.10.2016. godine

Sud Bosne i Hercegovine u Sarajevu, u apelacionom vijeću sastavljenom od sudija Zvezdana Antonović, kao predsjednika vijeća, Mirsada Džindo i Branko Morait, kao članova vijeća, odlučujući o žalbi političke stranke Savez za novu politiku, izjavljenoj protiv Zaključka Centralne izborne komisije Bosne i Hercegovine, broj: 05-1-07-5-1094/16 od 21.10.2016.godine, radi povrede pravila izbornog procesa, u nejavnoj sjednici, održanoj dana 31.10.2016. godine, donio je

R J E Š E N J E

Žalba se odbija.

O b r a z l o ž e n j e

Zaključkom Centralne izborne komisije Bosne i Hercegovine, broj i datum gornji, odbačen je zahtjev žalitelja za ponovno brojanje glasačkih listića na 14 biračkih mjesta u osnovnoj izornoj jedinici Bijeljina, kao nepotpun.

U žalbi žalitelj navodi da Centralna izborna komisija Bosne i Hercegovine nije detaljno proučila žalbu u vezi sa ponovnim brojanjem glasačkih listića na 14 biračkih mjesta u osnovnoj izornoj jedinici Bijeljina. Smatra da su priložili dovoljno dokaza u kojima se navode činjenice koje opravdavaju ponovno brojanje.

U odgovoru na žalbu Centralna izborna komisija je predložila da se žalba odbije kao neosnovana.

Pošto je ispitalo osporenu odluku u granicama žalbenih razloga, vijeće Apelacionog odjeljenja Suda Bosne i Hercegovine je zaključilo:

Žalba nije osnovana.

Centralna izborna komisija BiH je, prema stanju u spisu predmeta, postupala u ovom slučaju na zakonit i pravilan način, jer je pravilno utvrdila i ocijenila činjenično stanje i donijela pravilnu i zakonitu odluku. Kako proizilazi iz stanja u spisu predmeta, po mišljenju Apelacionog odjeljenja Suda Bosne i Hercegovine, donosilac ožalbene odluke, Centralna izborna komisija Bosne i Hercegovine je u konkretnom slučaju

pravilno utvrdila da žalitelj u konkretnom slučaju nije naveo tačno činjenično stanje kojima bi opravdao ponovno brojanje glasačkih listića na navedenim biračkim mjestima u osnovnoj izbornoj jedinici Bijeljina kao ni približan broj glasačkih listića za koje smatra da nisu ispravni. Također, donosilac ožalbenog zaključka je zaključkom o ispravci zaključka broj: 05-1-07-5-1094/16 od 25.10.2016. godine ispravio tehničku grešku u prvom stavu pobijanog zaključka, na koju je žalitelj ukazivao, što je jasno vidljivo u spisu predmeta. Ovaj sud smatra da je donosilac ožalbenog zaključka, u konkretnom slučaju, pravilno primjenio odredbe člana 5.30 stav 4 tačka 2 i 4 Izbornog zakona Bosne i Hercegovine.

Iz naprijed navedenog proizilazi evidentna činjenica da su neosnovani navodi podnositelja žalbe, jer je Centralna izborna komisija Bosne i Hercegovine postupila u skladu sa odredbama Izbornog zakona Bosne i Hercegovine, što znači da je i donijela zakonitu odluku.

Iz navedenih razloga apelaciono upravno vijeće Apelacionog odjeljenja Suda Bosne i Hercegovine, nalazi da je pobijani zaključak Centralne izborne komisije Bosne i Hercegovine pravilan i zakonit, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ br. 19/02 do 74/10) valjalo odbiti.

**Predsjednik vijeća
Sudija
Zvezdana Antonović**